



Euskadiko sei orduak

Parekotasuna izango da nagusi Anoetan

Goi mailako hamabi bikote arituko dira garaipenaren bila gaur belodromoan

Gaur arratsaldeko hiruretan hasita, eta gaueko bederatziak arte, txirrindularitza izango da protagonista Anoetako belodromoan. Hamabi bikote, zein baino zein hobe, arituko dira Euskadiko Sei Orduetako XIV edizio honetan irabazteko asmoz. Aurten ez da garaipena lortzeko faborito argirik ikusten.

PELLO Aiestaran / DONOSTIA

Gianni Bugno, Laurent Fignon, Urs Freuler, Guido Bontempi edo Moreno Argentin bezalako txirrindulari ospetsuak Anoetan bilduko diren zaletu guztien ahotan egongo dira dudarik gabe. Urtero bezala, maila handiko partaidetza izango da Donostiako belodromoan, aurreko edizioetan izandako kirolari batzuk huts egingo duten arren.

Hamabi izango dira guztira Anoetako belodromoko eraztunean korrituko duten bikoteak. Horien artean, De Wilde eta Veggerby aipatzea ezinbestekoa da, iazko edizioan beraiek izan bait ziren Euskadiko Sei Orduetako garaileak. Bikote handi hau aurreko puntan ibili da azken urteetan Donostian, eta azkenean sari handia lortu zuten iaz. Gaur ere garaipena eskuratzeko faboritoen artean agertzen dira, arerio benetan gogorrak izango dituzten arren.


Urs Freuler ere Anoetako pistari izango da gaur, urtero bezala. Suizarrak urte asko daramatza Anoetako zita honetan huts egin barik, eta gaur ere Donostian izango da, zaletuen gozamenarako. Oraingo honetan Holenwerger izango du bikote. Freulerrek badaki zer den proba honetan irabaztea, hiru ediziotan garaile izan bait da—1986, 1987 eta 1988an hain zuzen ere—. Gaur laugarrenez txapela jartzeko ahaleginak egingo ditu ezbairik gabe.

Hauekin batera, ezin ahaztu Bincoletto-Tourne, Argentin-Bontempi edo Clark-Gunther bezalako bikoteak, denak bait dira garaipena lortzeko faborito—Clark eta Tournek jadanik irabazi dute Sei orduetan—.

Euskadiko Sei Orduetan irabazteko faborito, pistako espezialistak badira ere, errepideko txirrindulariak izango dira zaletuen begiraden guneak. Gianni Bugno eta Laurent Fignon dira aipagarrienak. Biak ondo defendatzen dira pistari, baina Anoetan irabazteko aukera handirik ez dute izango. Roche eta Chiappucci ere bikote ikusgarri osatzen dute. Irlandarrak badaki eraztunean ibiltzea zer den. Chiappucci egin dezakeena aztertu behar, bikote honen aukerak ezagutzeko.

**EUSKALDUNAK
ZALETUAK
POZTERA**

Orain arte aipatutako txirrindulari izugarri horien artean, euskal ordezkariak ere bere




Danny Clark, munduko txapelduna.

lekutsoa izango dute. Guztira bost dira edizio honetan parte hartuko duten euskal txirrindulariak: Marino Lejarreta, Olano, Cabestany, Isasa eta Aranguren.

Teorian behintzat, gizon hauek ezer gutxi egin dezakete Freuler, De Wilde, Bincoletto...bezalako espe-


Dortsalak

1. De Wilde - Veggerby
2. Bugno - Fignon
3. Roche - Chiappucci
4. Mauri - Lejarreta
5. Olano - Cabestany
6. Clark - Gunther
7. Freuler - Holenweger
8. Bincoletto - Tourne
9. Bontempi - Argentin
10. Gorgen - Carrera
11. Moreno - Barrado
12. Isasa - Aranguren



Lejarreta eta Cabestany.

Cabestanyk podiumean sartzea dute helburu eta horretarako gogor lan egin beharko dute. Azkenik, bi txirrindulari gazte ditugu, isasa eta Aranguren afizionatuak alegia. Bost gizon hauek ez dira ziurrenik aurreko puntan izango, baina ikusleek asko eskertuko dute beren lana.



Zelai harrijasotzaileak.

Goenatxo eta Zelai harrijasotzaileak 150 kilokoarekin

P.A. / DONOSTIA

Euskadiko Sei Orduetako XIV edizio honetan gizon garrantzitsu bat botako dute faltan ikusleek. Iñaki Perurena leitzarrak ez du aurten parte hartuko aspaldiko partez, duela gutxi lesionatu egin bait zen. Nafarra gizon garrantzitsua izan da Euskadiko Sei Orduetako historian, marka asko bertan lortu bait ditu. Hala ere, antolatzaileek programa polita egin dute Perurenaren hutsunea betetzeko.

Goenatxo eta Zelai harrijasotzaile bikainak izango dira aurrez aurre, 150 kiloko kubikoarekin eta pisu berdineko errektangularrarekin. Proba honek bi saio izango ditu, lehena arratsaldeko 16.35tan eta bigarrena 17.25tan.

Baina ez dira hor amaitzen indar erakusketak. Aurten, eta lehenengo aldiz Euskal Herrian, Bruno Danovaro italiarra ikusteko aukera izango da. 23 urteko gazte honek munduko marka lortzeko saioa egingo du, 'Power Lifting' deitutako modalitatean. Danovaro 500 kiloko marka du—egungo munduko marka—eta gaur 510 kilo jasotzen saiatuko da.

MUSIKA ETA BERTSOLARIAK Musikak toki berezia izango du gaurko edizioan, arratsalde guztian zehar izango bait dira moeta honetako ikuskizunak. Antolatzaileek, urteroko programa berritzeko asmoz, Brasil maravillao izeneko musika eta dantza ikuskitzuna ekarri dute—18.55tan egingo dute lehen agerpena eta 19.45tan berriz bigarrena—.

Eta nola ez, txaranga ere ezin falta Anoetan. Los Incansables arituko dira bikoteen aurkezpenean, belodromoko giroa lehen momentutik berotzeko asmoz.

Bertsolaritza ere izango da Euskadiko Sei Orduetan, Anjel Mari Peñagarikano eta Sebastian Lizaso bertsolari bikainen eskutik.